

Pilersaarusiorneq nunaminertanillu atuineq pillugu Inatsisartut inatsisissaattut siunnersuut

(Ineqarnermut, Attaveqarnermut Angallannernullu Naalakkersuisoq)

**Saqqummiussissut
Siullermeerneqarnera**

Naalakkersuisut sinnerlugit matumuuna pilersaarusiorneq nunaminertanillu atuineq pillugu Inatsisartut inatsisissaattut siunnersuut saqqummiuppara.

Siunnersuusiordermi siullermik suliassa qarfiup iluani atuisut aningaasalersuinerisa annertusineqarnissaanik kissaateqarneq tunuliaqutaavoq. Ullumikkut kommunini pilersaarusiortarneq nunaminertanillu aqutsineq tamakkerluni kommuninut ataatsimoorussamik tapiissutit aqutigalugit aningaasalersorneqarpoq. Ataatsimoorussamilli tapiissutit ikilisinneqarnerisa kingunerisaanik suliassa qarfimmi aqutsinerup aningaasalersorneqarnera kommuninut unammilligassaqartitsilerpoq.

Aappaattut inatsisit suliassa qarfimmu atuttut ullumikkut Inatsisartut peqqussutaannut nalunaarummullu tunngasuupput. Taakku imarisamikkut imminnut qalleraapput, taamaattumillu inatsisit taakkua inatsimmut ataatsimoortillugit allanneqarnissaat KANUKOKA-mit aamma kommuninit siunnersuutigineqarpoq. Inatsisit ataatsimut allanneqarnerisigut inatsisit paasiuminassusiisa atoruminassusiisalu annertusinissaat Naalakkersuisut naatsorsuutigaat.

Inatsimmi immikkoortut pingaarnert makkuupput:

Nunaminertanik qinnuteqaatinik sularinninnermut akitsuutit

Nunaminertanik atugassiisarnermut atatillugu sularinninnermut akitsuusiinikkut atuisunut akiliisitsisalernissaq siunnersuutigineqarpoq. Naalakkersuisut isumaat malillugu taamatut atuisunut akiliisitsisalernissaq naleqquppoq. Kommunini nunaminertanik qinnuteqaatinik sularinninneq inunnut tamanut tunngasuunngilaq. Sularinninnerli qinnuteqartunut imaluunniit sanatitsisunut ataasiakkaanut immikkut tunngatillugu ingerlanneqartarpoq. Siunnersuummi nunamut piginnittussaanermut tunngatillugu inatsisitigut inissisimaneq maannakkut atuttoq allangortinneqanngilaq. Tassalu siunissami nunaminertanik atugassiisarnermi aamma nunaminertanik pisisoqartassanngilaq, tunisisoqartassanngilaq imaluunniit taarsigassarsinnermi qularnaveeqqusiussa qartoqartassanngilaq.

Nunaannarmi immikkoortiterineq

Nunaannarmi pilersaarusiordermi nunaminertanillu atugassiisarnermi oqartussaaffik 1. januar 2011-mi Naalakkersuisuniit kommuninut nuunneqassasoq aalajangerneqareerpoq. Siunissami nunaannarmi nunaminertanik atunerup immikkoortiterneqarnissaa Inatsisartut inatsisaanni aalajangersarneqarpoq. Illoqarfiit nunaqarfiillu ullumikkut inissiaqarfinnut, inuussutissarsiorfinnut qitiusoqarfinnullu immikkoortiterneqartarnerisut, nunaannarmi nunaminertat siunissami illuaraqarfinnut, teknikikkut atortoqarfinnut nunaminertanullu sanaartorfingitsunut immikkoortiterneqartalissapput.

Tamatumunnga atatillugu ilassutigineqarsinnaavoq tamatuma peqatigisaanik nunaannarmi nunaminertanik atuinerpiaq pillugu nuna tamakkerlugu pilersaarusiormut malittarisassanik Naalakkersuisut suliaqarmata. Nuna tamakkerlugu pilersaarusiormut malittarisassat taakku kommunit oqartussaaffimmik tigusinissaannik pisariinnerulersitsinissamik siunertaqarput.

Maalaaruteqartarfiup katitigaaneranut aalajangersakkat peerneqarput

Nunaminertanut peqqussummi atuuttumi maalaaruteqartarfimmik, katitigaanissaannik aalajangersimasumik nassuiaatitaqartumik pilersitsinissaq aalajangersarneqarpoq. Maalaaruteqartarfiup taassuma arlaannaannulluunniit attuumassuteqannginnissaata qulakkeerneqarnissaa siunertarineqarpoq. Aalajangersakkalli atuuttut pissutaallutik maalaaruteqartarfiup taassuma maalaaruteqartarfinnut allanut, soorlu avatangiisit imaluunniit pinngortitaq pillugu maalaaruteqartarfinnut kattunneqarnissaa ajornartinneqarpoq.

Inatsisartut isumaliutissiissutaanni pilersaarusiormut nunaminertanillu atuinermut maalaaruteqartarfiup sulianut attuumassuteqannginnissaata qulakkeerneqartariaqarnera pillugu allassimasut Naalakkersuisut isumaqatigaat. Taamaattorli maalaaruteqartarfiup siunissami maalaaruteqartarfinnut allanut assingusunut kattunneqarsinnaannginnissaa naleqquttut Naalakkersuisut isumaqarfiginngilaat. Taamaattumik maalaaruteqartarfiup katitigaanissaata aalajangersimalluinnartumik nassuiaatitallip Inatsisartut inatsisaannit peerneqarnissaa inatsisissatut siunnersuummi siunnerfigineqarpoq.

Allaffissornikkut akiliisitsissutit

Pilersaarusiormut inatsimmi maleruagassanik piumasaqaatinillu unioqqutitsinerit maannakkut pineqaatissiissutaasinnaapput. Ilaatigut sanatitsisut piginnittulluunniit eqqartuussivitsigut aalajangerneqartumik pillaammik akiliisinneqartarnerisigut tamanna pisinnaavoq. Kisiannili taamatut pisoqartillugu eqqartuussivitsigut aalajangerneqartumik akiliisussanngortitsisarneq pilaarunneqartarpoq. Taamaattumik amerlanertigut sanaartugaq naammassereersoq atorneqalereersorlu aatsaat akiliisussanngortitsisoqassanersoq akiliisussanngortitsisoqassannginnersorluunniit eqqartuussivitsigut aalajangerneqartarpoq. Taamaalluni sanaartukkani pineqartuni inatsisinut naapertuuttunngortitsinissaq nalilinnik tamaagaannartitsinissaq eqqarsaatigalugu amerlanertigut ajornartarpoq. Inatsisissatut siunnersuutip atuutilerneratigut oqartussaasut nunaminertanik aqutsisuusut inatsimmik unioqqutitsinernik paasisaqartillutik allaffissornikkut akiliisitsissuteqarnissamut periarfissaqalissapput.

Taamatut oqaaseqarlunga pilersaarusiorneq nunaminertanillu atuneq pillugu Inatsisartut inatsisissaattut siunnersuut Inatsisartuni kajumittumik suliassanngorlugu tunniuppara.